


TEZAUUR LITURGIC
1 IANUARIE

SLUJBA
SF.IERARH
ATANASIE
VOLHOVSKI,
EPISCOPUL
MOGHILEVULUI
ȘI POLOŢKULUI



MOSCOVA, 2000



Служба святителю Афанасию, Полтавскому

НА МАЛЕЙ ВЕЧЕРНИ

На Господи воззвах стихиры, глас 2. Подобен:
Доме Евфрафов

Дом Духа Святаго* сердце твое быть,* святителю
отче* Афанасие преблаженнейший,** темже Дух
Святой в тя вселися

В селениях Божественных* ныне ликовствуеши,*
Афанасие божественный,* с вышних на люди
твоя** призирай милостивно

Вселися в Тя, отче,* Духа Святаго благодать,*
Еяже причастницы* и нас сотвори** молитвами
твоими, святе

Храму украшение* мощи твоя суть,* от нихже
истекают* исцеления благодатная** верою тыя
лобзающим

Слава, глас тойже. Самогласен:

Святителю преблаженнейший* отче чудотворче
Афанасие, в житии твоём крест тяжкий

понесый, и гонения претерпевый, и клеветою уязвлен быв, ныне власть имаши оскорбляемым помогати, скорбныя же утешати молитвами твоими, святе

**На стиховне: Стихиры, глас 4. Подобен:
Званный свыше**

Званный свыше* к горнейшей славе* егда тьма клеветы* помрачи очи душевныя* и разума сотвори сетование* тогда небесный смысл возсиял есть* в души твоей, страдальче,* чистоту являяй твою,* темже познал еси Свет истинный,* Христа Бога нашего,* Егоже моли** спасти и просветити души наша

Стих: Священницы Твоя оденутся в правду

Призванный от Господа* в земнем житии ко страданию,* в небесном же* ко славе вечнующей,* злых людей кротостию препобедив,* и во свете ныне ликуеши,* очима своима видящи* пребожественную красоту* тобою всем сердцем возлюбленного* Христа Бога нашего,* Егоже моли** спасти и просветити души наша

Стих: Преподобнии Твои радостию возрадуются

Звание Божественное звание внушив* от человек же скорби восприяв* и тьму печалей,*

яже помрачи очи твоя,* к небесней светлости
возшед,* и к Свету пресветлому* и вышшему
всех светлостей,* ныне чистыма очима* зриши
светлый зрак* Христа Бога нашего,* Егоже
моли** спасти и просветити души наша

Слава, **глас 6. Самогласен:**

Верный рабе и пастырю добрый,* святителю
отче Афанасие,* греху прежде смерти умерев,* к
жизни вечней воскресл еси, святе,* скорби же и
клеветы претерпев,* ныне скорбных и обидимых
имаши власть утешати,* и ко Спасу молитися**
помиловатися душам нашим

Тропарь, глас глас 4:

Многоскорбный угодниче Христов, святителю
отче наш Афанасие, в житии своем крест
тяжкий понесый и многия гонения и клеветы
претерпевый, не остави нас, чад твоих, твоим
предстательством, имаши бо дерзновение ко
Господу молитися, о еже всякия скорби нам
претерпети достойно, ко спасению душ наших

НА ВЕЛИЦЕЙ ВЕЧЕРНИ

На Господи, воззвах стихиры, глас 4. Подобен:
Яко добля

Яко добраго пастыря* святителю Афанасие*
сошедшеся днесь восхвалим тя,* яко течение
совершив,* веру соблюл еси,* и прият от Бога по
страдании твоём венец;* Егоже моли от бед
избавитися* верою совершающим** всечестную
память твою

Яко великоименнаго* и воскресению
соименнаго* сошедшеся ныне, Афанасия
восхвалим,* той бо море жития преплыв,*
пристани небеснаго Царствия достиже,* и ныне
молится усердно* о обителях Полтавских,* верою
совершающих** всечестную память его

Яко святителя славна* и терпеливнаго
страдальца,* сошедшеся днесь воспоим
Афанасия,* чудес источника* и радости
небесныя подателя;* Сей бо в добродетелех
крепкий быв,* силу с небесе подает* верою
совершающим** всечестную память его

Яко безсмертию соименнаго* Афанасию
блаженне,* притекше к мощем твоим
цельбоносным,* восхваляем тя, отче;* ты бо
дерзновение имаши* ко Господу тепле молитися*

о оставлении грехов* всем верою
совершающим** всечестную память твою

Слава, **глас 5. Подобен: Преподобне отче**

Святителю отче, богоносе Афанасие* вельми
подвизался еси в жизни временней,* в терпении
скорбей и напастей,* образ пастве твоей быв;*
ныне же ликуеши с безплотными,* Христа
непрестанно славословя* со Отцем и Святым
Духом,* Троицу Святую, Едино Божество.*
Темже ти припадаем, святе:* Господеви
помолися* даровати церкви единомыслие,** и
душам нашим велию милость

Чтения три:

Премудрости Соломоновы чтение:

Праведных души в руце Божией, и не
прикоснется их мука. Непщевани быша во
очесех безумных умерети, и вменися озлобление
исход их. И еже от нас шествие сокрушение, они
же суть в мире. Ибо пред лицом человеческим
аще и муку примут, упование их безсмертия
исполнено. И в мале наказани бывше, великими
благодетельствовани будут, яко Бог искуси их, и
обрете их достойны Себе. Яко злато в горниле
искуси их, и яко всеплодие жертвенное прият я.
И во время посещения их возсияют, и яко искры

по стеблию потекут. Судят языком, и обладают людьми, и воцарится Господь в них во веки. Надеющиеся на нѣ, разумеют истину, и вернии в любви пребудут Ему: яко благодать и милость в преподобных Его, и посещение во избранных Его.

Премудрости Соломоновы чтение:

Праведницы во веки живут, и в Господе мзда их: и попечение их у Вышняго. Сего ради примут царствие благолепия, и венец доброты от руки Господни: зане десницею покрывает я, и мышцею защитит их. Приимет всеоружие рвение свое, и вооружит тварь в месть врагом. Облечется в броня правды, и возложит шлем, суд нелицемерен. Приимет щит непобедимый преподобие. Поострит же напрасный гнев во оружие: споборет же с ним мир на безумныя. Пойдут праволучныя стрелы молниины, и яко от благокругла лука облаков, на намерение полетят. И от каменометныя ярости исполнь падут грады. Вознегодует на них вода морская, реки же потопят я нагло. Сопротив станет им дух силы, и яко вихор развеет их, и опустошит всю землю беззаконие, и злодейство превратит престолы сильных. Слышите убо царие, и разумеите, навыйкните судии концев земли. Внушите держащии множества, и гордящиися о народах

языков, яко дана есть от Господа держава вам, и сила от Вышняго.

Притчей чтение:

Память праведнаго с похвалами, и благословение Господне на главе его. Блажен человек, иже обрете премудрость, и смертен, иже уведет разум. Лучше бо сию куповати, нежели злата и сребра сокровища. Честнейшая же есть камней многоценных, все же честное недостойно ея есть. Долгота бо дней и лета живота в деснице ея, в шуйце же ея богатство и слава. От уст ея исходит правда, закон же и милость на языке носит. Послушайте убо Мене, о чада, честная бо реку: и блажен человек, иже пути Моя сохранит; исходи бо Мои, исходи живота, и уготовляется хотение от Господа. Сего ради молю вас и предлагаю Мой глас сыновом человеческим: яко Аз премудрость устроих, совет и разум, и смысл Аз призвах. Мой совет и утверждение, Мой разум, Моя же крепость. Аз мене любящая люблю, ищущии же Мене обрящут благодать. Разумейте убо, незлобвии, коварство, ненаказании же, прилагайте сердца. Послушайте Мене и паки, честная бо реку: и отверзу от устен правая, яко истине поучится гортань Моя, мерзски же предо Мною устны лживыя. С правдою вси глаголы уст Моих:

ничтоже в них стропотно, ниже развращенно. Вся права суть разумевающим и проста обретающим разум. Научаю бо вас истине, да будет о Господе надежда ваша и исполнитесь Духа.

НА ЛИТИИ

Стихиры, глас 8. Подобен: Что вас наречем

Что ты наречем, святителю* Ангелом ли, яко о телеси небрегл еси?* Херувимом ли, яко на тебе Христос почил есть?* Серафимом, яко безпрестани славил еси Бога?* Силою ли, яко чудеса источаеши?* многа твоя имена,* и большая дарования;** моли спастися душам нашим.

Что ты наимуем, угодниче Христов* апостолом ли, яко многи ко истинней вере обратил еси?* мучеником ли, яко страдания претерпел еси?* преподобным ли, яко в подвизах Христа прославил еси?* блаженным ли, яко блаженный жизни еще в страдании причастник был еси?* многа твоя имена,* и большая дарования;** моли спастися душам нашим.

Чим ты прославим, славне Афанасие* песньми ли, яко Христа воспел еси?* псалмы ли, яко псаломски чрез все житие твое жительствова

еси?* поклонением ли, яко и сам ты в истине и душе Богови поклонялся еси?* славословлением ли, яко Бога выну славословил еси?* многа твоя имена,* и большая дарования;** моли спастися душам нашим.

Како ты воспоем, святче Божий* или како возыменуем тя?* Ты бо предстатель о земли Полтавстей* изряден явился еси,* и обителей твоих пастырь добрейший;* многа твоя имена,* и большая дарования;** моли спастися душам нашим.

Слава, **глас тойже.**

Терпеливодушнаго святителя* ныне сошедшееся воспоем* той бо имать дерзновение* о земли Полтавстей молиться,* обители же ея молитвами своими утверждати,* нам же всем от Господа испросити** мира и велия милости.

**На стиховне: стихиры, глас 8. Подобен:
Мученицы Твои, Господи**

Святитель Твой, Господи* забы житейская* небреже и о поношениях* будущия ради жизни;* тоя наследник явися,* темже со ангелы радуется** того молитвами даруй людям Твоим велию милость.

Стих: Честна пред Господом смерть
преподобных его

Угодник Твой, Христе Боже* отверже сладости
мира,* небреже и о клевете,* небеснаго ради
Царствия;* того причастник явился,* тамо с лики
святых торжествует;** того молитвами сохрани,
Боже, землю нашу Полтавскую.

Стих: Восхвалятся преподобнии во славе, и
возрадуются на ложах своих

Страдалец вольный быв Бога ради* отвержеся о
себе попечения,* небреже о славе земней,*
Горняго Иерусалима ради;* темже и небесный
гражданин явился,* и молится прилежно** о еже
спастися душам нашим.

Слава, **глас 1.**

Мира никакоже волюбив,* горняго же возжелев
издетска* святителю избранне,* от человек
поношения прияв,* от Бога венец
приемлещи;* Тому помолися, угодниче Христов,*
и испроси душам нашим** мира и велия
милости.

Тропарь, глас 4.

Многоскорбный угодниче Христов, святителю
отче наш Афанасие, в житии своем крест

тяжкий понесый и многия гонения и клеветы претерпевый, не остави нас, чадо твоих, твоим предстательством, имаши бо дерзновение ко Господу молиться, о еже всякия скорби нам претерпети достойно, ко спасению душ наших

НА УТРЕНИ

По кафизме седален, глас 1.

Спаси, Христе, люди Твоя,* сошедшиися днесь в память святаго,* и благослови наследие Твое;** за нас бо молится угодник Твой и заступник наш, Афанасий святитель избраннейший.

Ин седален, глас тойже.

Помяни, Спасе, обители Полтавския,* в нихже угодник Твой Афанасий подвизався,* в небесные обители отъиде,* отонудуже призывает на паству свою,* и молится Тебе прилежно** спастися душам нашим

Слава, и ныне: Богородичен, глас тойже

ПОЛИЕЛЕЙ

Величание святителю:

Величаем тя,* святителю отче наш Афанасие,* и
чтем святую память твою,* ты бо молиши о
нас** Христа Бога нашего

Во обителях же:

Величаем тя,* святителю отче наш Афанасие,* и
почитаем скорби и болезни твоя,** о обители
твоей теплый предстателю

Или:

Ублажаем тя,* многоскорбный святителю
Афанасие,* и почитаем многотрудное житие
твое,* ты бо дерзновение имаши молитися** о
душах наших

**По полиелеи седален, глас 3. Подобен: Дева
днесь**

Святитель Афанасий днесь предстоит Престолу
Царя славы,* и вся земля ликовствует,* Ангелы с
чловецы согласно поют,* и пастыри с
инокинями поклоняются,* за нас бо молит
святитель** Превечнаго Бога.

Слава, и ныне. **Богородичен, глас тойже.**

Дева днесь покрываем покровом Своим святым
верныя люди Своя, сошедшиися в память

многоскорбного и всерадостного святителя
Афанасия.

Степенна, 1-й антифон 4-го гласа: От юности
моея

Прокимен: Честна пред Господом смерть
преподобных Его

Стих: Что воздам Господеву о всех, яже воздаде
ми

Евангелие: Матфея, зач. 11 (Мф. 4.25–5.12)

Во время оно, по Иисусе идоша народи мнози от
Галилеи и десяти град, и от Иерусалима и иудей,
и со онаго полу Иордана. Узрев же народы,
взыде на гору: и седшу Ему, приступиша к Нему
ученицы Его. И отверз уста Своя, учаще их,
глаголя: блажени нищии духом: яко тех есть
Царствие небесное. Блажени плачущии: яко тии
утешатся. Блажени кротцыи: яко тии наследят
землю. Блажени алчущии и жаждущии правды:
яко тии насытятся. Блажени милостивии: яко
тии помиловани будут. Блажени честии сердцем:
яко тии Бога узрят. Блажени миротворцы: яко
тии сынове Божии нарекутся. Блажени изгнани
правды ради: яко тех есть Царствие небесное.
Блажени есте, егда поносят вам, и ижденут, и
рекут всяк зол глагол на вы лжуще, мене ради:

радуйтесь и веселитесь, яко мзда ваша многа на небесех:

По Евангелии стихира, глас 6:

Верный рабе и пастырю добрый,* святителю
отче Афанасие,* греху прежде смерти умерев,* к
жизни вечней воскресл еси, святе,* скорби же и
клеветы претерпев,* ныне скорбных и обидимых
имаши власть утешати,* и ко Спасу молитися**
помиловатися душам нашим

Канон, глас 2,

егоже краегранесие (тропари без ирмосов):

Безсмертия соименному святителю пою

Песнь 1

Ирмос: Грядите людие, поим песнь Христу Богу,
раздельшему море, и наставльшему люди, яже
изведе из работы египетския, яко прославися.

Боже премилостивый, даруй мне слово, да
воспою угодника Твоего Афанасия; той бо,
благочестно пожив, в Горняя преставился
обители, и молится о всех, чтущих святую
память его.

Еже по образу соблюдый неврединно, к
Первообразному возшед, ныне зриши озлобление

людей твоих; темже помози нам, милостиве
Афанасие

Зиму страстей мира молитвою согрел еси, мрак
же греха праведностью просветив, ныне
торжествуеши на небеси, угодниче славный
Христов, Афанасие

Богородичен:

Славная Дево и Пренепорочная, моли Сына
Твоего и Бога нашего спастися душам нашим.

Катавасия: Глубины открыл есть дно...

Песнь 3

Ирмос: Утверди нас в Тебе Господи, древом
умерщвлей грех, и страх Твой всади в сердца
нас поющих Тя.

Милостивый святителю и добрый рабе Христов,
умоли Милостиваго, да прегрешений оставление
подаст душам нашим.

Елеем милости Христовой утолив скорби твоя,
славне, и ныне тойже елей изливаеши всякому
страждущему, от сердца поющему тя.

Радости Божественныя и нас исполни,
святителю, от Источника радости присно бо
черплеши, и прохлаждаеши скорби поющих тя.

Богородичен:

Твердому в вере, истинному же в словесех
Афанасию Пресвятая Богородица новый смысл
подаде, ветхий же разум обнови, яко да воспоеет
Сына Ея прилежно.

Седален, глас 4. Подобен: Вознесыйся на крест волею

Восшед волею на крест терпения, воскресл еси к
жизни лучшей, соименный бо воскресению,
Афанасие, быв, сие в житии твоём показав,
имый Христа непобедимую победу.

Богородичен, глас тойже.

Пресвятая и всечистая Дево, Мати Господа
небесе и земли, со святителем моли о нас
Безсмертного Бога.

Песнь 4

Ирмос: Услышах Господи, слух Твоего
смотрения, и прославих Тя, едине
Человеколюбче.

Имеяй велие упование на Господа, тое никакоже
посрамил еси, Афанасие премудре, тако бо все
житие скончав, единого токмо возжелел еси, яко
да прославити Единого Человеколюбца

Явися яко солнце житие твое, святе, светом же сего просвещаемы, и теплотою согреваемы, прославляем Христа, Солнце правды и Единого Человеколюбца.

Страждущим и обидимым ныне предстатель явился еси, преблаженне: сам бо пострадав, имаши власть и дерзновение молити о обидимых Единого Человеколюбца.

Богородичен:

Отвратити гнев Божий, Богородице, грех ради наших на ны находящий, молитвами святителя Афанасия, умоли, Дево, Господа единого Человеколюбца.

Песнь 5

Ирмос: Света Подателю, и веков Творче Господи, во свете Твоих повелений настави нас: разве бо Тебе иного Бога не знаем.

Изведи из темницы грехов страждущую душу мою, Афанасие отче милостивый, и воскреси ю, умершую грехом, воскресению бо соименный.

Милостиваго Творца милости изливаеши обильно всем, мощем твоим православно кланяющимся, и Господа сердцем и усты исповедающим.

Езекииных слез и покаяния Давидова не имам, Господи, обаче приношу ти молитвы угодника Твоего Афанасия, той бо имать дерзновение молиться о нас к Тебе; разве бо Тебе иного бога не знаем.

Богородичен:

Небесная царице, ангелы воспеваемая и от всех земнородных покланяемая, прими недостойную молитву нашу, и принеси ю Сыну Твоему, да спасет души наша.

Песнь 6

Ирмос: Бездна мя многа греховная окружает, и вопию Ти, пророка подражая: от тли мя Господи возведи.

Не ктому страждеши, ниже болелуеши, отче Афанасие, обаче в радости пребываеши, темже молитвами твоими и нас от тли страстей свободи

Обыде мя бездна, страсти же моя яко волны погружают корабль души моея; но ты, святе, молитвами твоими от сих мя избави

Моря греховного избегнув, к тихому пристанищу притекл еси, отче, темже и всем яко звезда

путеводная являешия ко пристанищу
небесному

Богородичен:

Умершаго мя грехом оживи благодатию Сына
Твоего, Дево Мати, приносим бо Тебе наша
молитвы яко дар, иного бо не имамы упования
по Бозе, токмо Тебе, Милостивая

Кондак, глас 8

Избранный от юности угодниче Христов,* славу
мира нивчтоже вменивый и Господу
последствовать возжелевый,* темже поношения
и гонения паче хвалы вменил еси,* и даже до
смерти о Церкви Святей болезновал еси,* сего
ради зовем ти умильно:* Радуйся,
многоскорбный святителю Афанасие,* радости
небесныя причастниче.

Икос:

Ангелов собеседника и земным скорого
помощника воспети дерзаю, грешный аз. Ты же,
отче святой, Афанасие великоимените, не
отвергни теплую молитву сердца моего, но яко и
в прежняя лета скорбящим и недужным помогал
еси, тако и ныне услыши мене, смиренного,
поющего ти сие: Радуйся, даре Божий
нарочитый; радуйся, безсмертия соименитый.

Радуйся, смиреннейший на земли; радуйся, превознесенный на небеси. Радуйся, молитвы грешников приемляй; радуйся, никогдаже просящих отреваяй. Радуйся, красото Церкви изрядная; радуйся, утверждение Православия крепкое. Радуйся, многоскорбный святителю Афанасие, радости небесныя причастниче.

Ин икос:

Истины служителя безсмертию соименного похвалим Афанасия, сей бо есть скорый помощник и услышатель всякому, тако его поющему: Радуйся, помощниче наш верный; радуйся, молитвенниче о нас усердный. Радуйся, в беде сущих покровителю; радуйся, скорбящих возвеселителю. Радуйся, согрешение душ хладных; радуйся, радости душ праведных. Радуйся, многоскорбный святителю Афанасие, радости небесныя причастниче.

Песнь 7

Ирмос: Образу златому на поле деире служиму, трие Твои отроцы небрегоша безбожнаго веления: посреде же огня ввержени, орошаеми пояху: благословен еси Боже отец наших.

Святитель непорочный быв, слово истины Христовой верно правив, ныне венчаешься от Пастыреначальника и Бога отец наших.

Воин Христов на неверныя ополчаясь был еси, темже и воинствующим противу плоти, мира и диавола помощник являешься, подавая силу и крепость от Бога отец наших.

Язвы души моя уврачуй, Господи, молитвами угодника твоего Афанасия; той бо молит присно о всех нас Бога отец наших.

Богородичен:

Твоих песнословцев не отвержи, Пречистая, в молитвах к тебе святителя Афанасия приводящих, и просящих от Господа многих грехов прощения.

Песнь 8

Ирмос: Неизреченною мудростию составльшаго всяческая Бога Слова, и от не сущих во еже быти Приведшаго, благословите дела яко Господа, и превозносите во вся веки.

Имый влечение к Богу, от земнаго неудержан пребыл еси, темже к Богу возводиши, чтущих святую память твою, и превозносящих Господа во веки.

Творец и Избавитель твой, Афанасие, сотвори ты якоже адамант противу искушений, и избави ты от скверн мира; темже и воспеваеши Господа, превозносяще его во веки.

Единому Богу поработав, славы людския никакоже взыскав, прославлен ныне от Господа, святителю отче наш Афанасие. Темже имаши власть молитися, да и мы всем сердцем Господу Единому прилепимся, превозносяще Его во веки.

Богородичен:

Льстивый и наветник клевету на святителя кроткаго воздвиже, обаче ничтоже успе: Богородитца бо вся козни лукаваго разори, святителя же утеши, выну бо той взываше: благословите Господа, и превозносите во вся веки.

Песнь 9

Ирмос: Яже прежде солнца светильника Бога возсиявшаго, плотски к нам пришедшаго из боку Девичу, неизреченно воплотившая, Благословенная Всечистая: Тя Богородице величаем.

Южные страны и северныя тебе хвалу приносят, отче, людие же вси верно почитают память

твою. Ты бо светильник явился еси миру пресветлый, и Господа прославив в житии твоём, ныне от Него на небесех прославляешься.

Припадают к раце мощей твоих архиереев сонм, священников же сословие; иноков же и инокинь лица торжествуют, имущии такового молитвенника и заступника пред Господом

Отдаю тебе пение сие, яко долг некий, обаче ничтоже достойно твоих дарований принесох ти, отче милостивый. Токмо молю тя, Афанасие, безсмертия вожделенного сподоби и мя, последнего от молитвенник твоих.

Богородичен:

Юница нескверная, рождающая Закланного за спасение мира, Того со святителем Афанасием моли, да спасет души наша.

Светилен. Подобен: Небо звездами

Небо звездами красивый яко Бог, и Твоими святыми всю землю просветивый, Содетелю всех, поющия Тя спасай.

Богородичен:

Богородице, упование христианом, со всеми святыми поющия Тя избави от всех мук.

На хвалитех стихиры, глас 1. Подобен: небесных чинов

Небесных чинов совсельниче,* человеком же на земли предстателю,* отче наш Афанасие,* умоли о нас, тебе почитающих,* яко на дивнаго во святых Господа** все упование наше возлагаем.

Небесных ликом равночестне,* земных никакоже оставляеши* молитвами твоими, святе,* землю Полтавскую покрываеши,* и о обителях наших ходатайствуеши,** на Господа упование верное возложивших

Небесных сил сожителю,* и Господа верный служителю,* Афанасие богомудре,* умоли Милостиваго,* да милостив будет всем нам,** на Него упование едино возложивших.

Небесныя радости причастниче,* тоя причастницы и нас сотвори* предстательством твоим, блаженне,* и к жизни вечней настави нас,* поющих святую память твою;** и на Творца упование твердое возложивших.

Слава, глас тойже. Подобен: О, дивное чудо

О, дивное чудо,* источник исцелений источают нам* всечестныя мощи святителя Афанасия.* Веселися, граде Полтаво,* радуйтесь, обители иноческия,* ликуйте, вернии:* не остави бо нас

своим предстательством* угодник Христов и страдалец,* на земли скорбный иногда* и на небеси ныне ликовствующий** и просящий всем нам от Господа великия милости.

Славословие, тропари и отпуст

НА ЛИТУРГИИ

Прокимен, глас 7: Возвеселится праведник о Господе, и уповает на Него

Стих: Свет возсия праведнику, и правым сердцем веселие

Апостол: Иак. 50 (Иак. 1. 1–18)

Иаков, Богу и Господу Иисусу Христу раб, обеманадесяте коленома, иже в разсеянии, радоватися. Всяку радость имейте, братие моя, егда во искушения впадаете различна, ведяще, яко искушение ваша веры соделоваеет терпение: терпение же дело совершенно да имать, яко да будете совершенни и всецели, ни в чемже лишени. Аще же кто от вас лишен ест премудрости, да просит от дающаго Бога всем нелицеприемне и не поношающаго, и дастся ему. Да просит же верою, ничтоже сумняся: сумняйся бо уподобися волнению морскому,

ветры возметаему и развеваему. Да не мнит бо человек он, яко приимет что от Бога. Муж двоедушен неустроен во всех путех своих. Да хвалится же брат смиренный в высоте своей, богатый же во смирении своем, зане якоже цвет травный мимоидет: возсия бо солнце со зном, и изсуши траву, и цвет ея отпаде, и благолепие лица ея погибе: сице и богатый в хождении своем увядает. Блажен муж, иже претерпит искушение: зане искусен быв, приимет венец жизни, егоже обеща Бог любящим Его. Никтоже искушаемь да глаголет, яко от Бога искушаемь есмь: Бог бо несть искуситель злым, не искушает же Той никогоже, кийждо же искушается, от своя похоти влекомь и прельщаемь: таже похоть заченши раждает грех, грех же содеян раждает смерть. Не льститесь, братие моя возлюбленная: всяко даяние благо и всяк дар совершен свыше есть, сходяй от Отца светов, у негоже несть пременение, или преложения стень. Восхотев бо породил нас словом истины, во еже быти нам начаток некий созданием его.

Аллилуиа, **глас 8**

Стих: Веселитесь о Господе, и радуйтесь, праведнии

Стих: Восхвалятся преподобнии во славе, и
возрадуются на ложах своих

Евангелие: Матфея, зач. 43 (Мф. 11. 27–30)

Рече Господь Своим учеником: Вся Мне предана
суть Отцем моим: и никтоже знает Сына, токмо
Отец: ни Отца кто знает, токмо Сын, и емуже
еще волит Сын открыть. Приидите ко Мне вси
труждающиеся и обремененнии, и Аз упокою
вы: возьмите иго Мое на себе и научитесь от
Мене, яко кроток Есмь и смирен сердцем: и
обрящете покой душам вашим: иго бо Мое
благо, и бремя Мое легко есть.

Причастен: В память вечную будет праведник,
от слуха зла не убоится.

